

virtutum fidei, spei, et charitatis, quibus
primus homo in paradyso ornatus fuerat, ad
peccatum originis, vel ejus effectus sine du-
bio pertinere.

FINIS DECIMÆ QUARTÆ CONTROVERSIE GENERALIS.

LAUS DEO VIRGINIQUE MATRI MARIAE.

DECIMA QUINTA

CONTROVERSIA GENERALIS

DE

REPARATIONE GRATIÆ

PER JESUM CHRISTUM DOMINUM NOSTRUM

QUE TRES PRINCIPALES CONTINET

*Quarum Prima est, de Gratia et libero arbitrio, in sec libros divisa.
Secunda, de Justificatione, et bonis operibus generatim, quinque
libris explicata. Tertia, de bonis operibus in specie, tres libros com-
plete.*

DE LIBERO ARBITRIO

PRÆFATIO

IN GYMNASIO ROMANO ANTE STUDIORUM INSTAURATIONEM HABITA

Parum omnino, auditores, dementiae, ac furori hæreticorum hujus temporis videbatur, si Christo solum, atque omnibus Sanctis, totique Catholicae Ecclesiae bellum indicerent, nisi etiam in ipsam naturam generis humani, atque adeo in sua ipsorum capita atque viscera, infestas manus, gladiosque converterent.

Eripuerunt Christo innumerabiles virgines sacras, quas cœlesti thalamo jam addixerat, sibique ipse solemnî cærenomia, rituque desponseral. Detraxerunt beatis angelis et hominibus cœlum cum Christo tenentibus praeconia, signa, basilicas, dies festos, mortalium vota, preces, implorations, omnia denique et illis debita, et nobis salutaria monumenta virtutum. Abstulerunt Ecclesiae bonam Sacramentorum partem, non paucos libros sacros, divinum ac saluberrimum sacrificium, Apostolicas traditiones, atque Ecclesiasticas cærenomias universas. Ad extremum Pontifices, auctoritate; Principes, imperio; populos, disciplina; pastores, gregibus; greges, pastoribus; veneratione, reliquias; reliquiis, aras; aris, templa; templis, religionem; religione, terrarum orbem prædones importunissimi spoliaverunt.

Nec tamen his tot, ac tantis sacrilegiis perpetratis hæreticorum furor, ac rabies conquievit, donec etiam ut se, ac suos, totamque naturam generis humani violarent, arbitrii libertatem nobis omnibus suis sententis detraxerunt, seque ipsi non belluarum similes, sed belluas plane rationis experti non dubitarunt. Quod ego, quando præfandi usus in hoc nostro gymnasio veteri more jam est receptus, quam brevissime potero demonstrabo.

Quamquam, si vere ac sapienter judicare volumus, non libertatem arbitrii tot libris ac disputationibus hæretici vel in se, vel in nobis

REPARATIONE GRATIA

DE LIBERO ARBITRIO

CONTROVERSIÆ CENEVALLIÆ

LIBERIS LIBRARIA COMITATU

DE LIBERO ARBITRIO CONCILII

extinguunt, sed animum male sanum produnt suum, et ex hoc uno stultiissimo dogmate insigne adferunt universo doctrinae sue corpori detrimentum.

Quis igitur istis fidem habere possit, dum de Deo, de Justitia, de Sacramentis, deque aliis rebus gravissimis atque abstrusissimis disputant : cum eos videat de suorum animorum libertate, quam sentire et experiri coguntur, tam perverse judicare ? Quis non eos amentes et furiosos, et simul ingratos divino numini esse censeat, qui tam excellens et praeclarum Dei donum, quod nec ob magnitudinem contemni, nec ob usum frequentissimum latere potest, cum per singula pene momenta in aciem oculorum et mentis incurrat, tamen obstinatissime respuere, refutare, abjecere, execrari pergunter ?

An vero non est eximium Dei munus libertas arbitrii, quod Nissenus Gregorius, « optimum quiddam, et omnium, quae sunt in homine, praestantissimum » esse definit ? quo solo et a brutis animantibus separamur, et proxime ad Angelorum naturam accedimus, et ipsius divini numinis imaginem gerimus, et rebus omnibus, quae sunt infra lunam, tanquam Dii quidam terrestres praesumus ?

Deinde si tollas arbitrii libertatem, nonne vides una repente concidere omnia pene hominum bona, quae illa videlicet sede, illo fundamento nitebantur ? et ubi quæso erit justitiae splendor ? ubi temperantiae decus ? ubi virtutum cæterarum chorus ? ubi laus benefactorum ? ubi præmium meritorum ? quid ? quod nec sempiterna felicitatis capax esse, si B. Augustino et B. Bernardo credimus, nisi arbitrii libertas potest ? « Neque gratia (inquit Augustinus lib. Hippognostici 3.) sine libero arbitrio facit hominem beatam vitam, nec liberum arbitrium sine gratia. » Et B. Bernardus : « Tolle, inquit, liberum arbitrium, non erit quod salvetur : tolle gratiam, non erit unde salvetur ». Quantum igitur Dei donum illud existimandum est, sine quo nec boni, nec beati, ac ne homines quidem unquam esse potuissemus ?

Quod si de populari libertate, qua regius dominatus excluditur, quæ melius umbra quædam, et imago libertatis, quam libertas dici potest, quæque diutius nisi summo labore non conservatur, et raro salutaris, saepius noxia esse solet, tamen M. Tullius dixisse vere putatur, tantum in ea libertate inesse boni, ut non solum ab hominibus, verum etiam a bestiis expetatur, ac non immerito rebus omnibus anteponatur : quid nos tandem de naturali illa, et germana libertate dicere par est, quæ animis nostris a Deo conditore insita et impressa, nihil esse videtur aliud (ut S. ait Bernardus serm. 81. in Cantica) nisi « divinum quiddam præfulgens in animo, tanquam gemma in auro, quod et summum na-

turæ nostræ splendorem, atque ornamentum adfert, et nullis criminiibus aboleri, nullis calamitatibus minui, nulla externa vi labefactari, destruive potest ? »

Sed forte nimis abdita atque absfrusa res est libertas arbitrii, nec nisi a paucis, iisque acutissimis et doctissimis perspici potest. Nolo verbis meis respondere, S. Augustinum, quem unum ex omni vetustate soberum in hac causa fuisse Calvinus dicit, si placet audiamus. Is in eo lib. quem de duabus animabus contra Manichæos scripsit, de libero arbitrio in hæc verba loquitur : « Neque hic, inquit, libri obscuri mihi scrutandi erant, unde discerem, neminem vituperatione, supplicio dignum, qui id non faciat quod facere non potest, nonne ista cantant et in montibus pastores, et in theatris poetæ, et indocti in circulis, et docti in bibliothecis, et magistri in scholis, et antistites in sacris locis, et in orbe terrarum genus humanum : » Et in lib. de vera religione. « Atque adeo, inquit, hoc est manifestum, ut nulla doctorum paucitas, nulla indoctorum turba dissentiat. » Quid potuit clarius de hujus quæstionis clarior duci ?

Quis igitur eorum sive stuporem, sive furorem non admiretur, qui magistri orbis terrarum haberi volunt, et vel id ignorant, quod et pastores in montibus et in theatris poetæ, et indocti in circulis decantant ? vel falsum esse contendunt, quod et docti in bibliothecis, et magistri in scolis, et Pontifices in templis, et ipsum genus humanum in orbe terrarum clarissima voce, summaque animi consensione verissimum esse testatur ? Quid ? quod communem hunc sensum et consensum orbis terræ, ac præcipue veterum Patrum, majorum nostrorum non ignorant hujus temporis hæretici : et tamen sine ullo pudore, inusitato genere superbiae, incredibilius audacia paucitatem suam, multitudini generis humani; imperitiam suam, sapientiae omnium Patrum ; novorum dogmatum vanitatem, auctoritati gravissimæ vetustatis totius, ac sæculorum omnium anteponunt. Ac ne aliquid me fingere, vej augere plusquam oporteat arbitremini, eorum ipsorum, quorum de stultitia verba facimus, testimonia proferamus ; ordiamur, si ita viderit, ab historicis, quorum præcipua laus est veritas.

Matthias Illyricus in illa sua centuriata historia, centur. 2. cap. 4. col. 39. cum Justini, Irenæi, atque aliquot aliorum Patrum vetustissimorum sententias de libero arbitrio retulisset, hæc verba subiecit : « Eodem modo Clemens Alexandrinus liberum arbitrium ubique asserit, ut appareat in ejusmodi tenebris » (sic enim liberi arbitrii confessionem vocat) « non tantum fuisse omnes ejus sæculi Doctores, verum etiam in posterioribus eas subinde crevisse. »

Non est autem hoc loco prætereundum, eos Doctores, de quibus in

eo libro Illyricus agit, illos esse, qui vel Apostolos ipsos loquentes au-
dierunt, vel certe Apostolis proxime successerunt. Quod si doctores
illi, omnes ad unum (ut adversarii confitentur) liberum arbitrium
ubique asseruerunt, neque fieri potest, ut reliquus cœtus fidelium
aliud senserit in dogmatibus fidei, quam quod a Doctoribus suis didi-
cerat, certe omnis illa prima Ecclesia, qua Christi sanguinem adhuc
prope calentem exceptit, quæque ardore fidei ad confessionem prom-
ptissima, et fortissimorum martyrum coronis et triumphis celeberrima
fuit, illæ, inquam, fidelium primitiae, omnes omnino (Illyrici testi-
monio) eam de libero arbitrio fidem tuebantur, quam ipse Illyricus
cum Lutheram ceteris oppugnat.

Neque solum prima illa ætas, verum etiam posteriores omnes (ejus-
dem Illyrici testimonio) doctrinam eamdem incredibili consensu te-
nuerunt. Id enim illa verba significant : « Ut appareat in ejusmodi te-
nebris non tantum fuisse omnes ejus sæculi Doctores, verum etiam in
posterioribus eas subinde crevisse. » Possem et alia, si per tempus li-
ceret ex eadem historia testimonia decerpere : sed ad cæteros auctores
festinat oratio.

Philippus Melanchthon in eo libro, quem de Locis communibus
primum edidit : « In hoc, inquit, loco, cum prorsus Christiana doctrina
a philosophia et humana ratione dissentiat, tamen sensim irrepsit
philosophia in Christianismum, quia receptum est impium de libero
arbitrio dogma, et obscurata Christi beneficentia per profanam illam,
et animalem rationis nostræ sapientiam : usurpata est vox liberi ar-
bitrii, a divinis litteris, a sensu et judicio spiritus alienissima, qua
videmus sanctos viros non raro offensos esse. Additum est e Platonis
Philosophia vocabulum Rationis æque perniciosum. Nam perinde atque
his posterioribus Ecclesiæ temporibus Aristotelem pro Christo sumus
amplexi, ita statim post Ecclesiæ auspicia per Platonicam philosophiam
Christianæ doctrina labefactata est : ita factum est, ut præter canonicas
Scripturas, nullæ sint in Ecclesia sinceræ litteræ. Redolet philosophiam
quicquid omnino commentariis proditum est. » Hæc ille, qui quidem,
nescio an apertius poterat indicare, se bellum cum omnibus Ecclesiæ
Patribus et Doctoribus, gerendum suscepisse, et aliam omnino fidei
doctrinam a se tradi, aliam esse eam, quam universa Christi Ecclesia
jam inde ab Apostolicis temporibus didicerit semper et docuerit. Nec
enim alia de causa nullas esse dicit in Ecclesia sinceræ litteræ et phi-
losophiam redolere omnes veterum commentarios, nisi quia negare
non poterat, omnibus omnium Patrum libris, commentariis, historiis,
concionibus, liberum arbitrium liberriime atque apertissime prædicari.

Jam vero Philippum secutus Joannes Brentius in Apologia pro Con-

fessione sua Wirtembergensi : « Pater, inquit, e cœlis clamavit, non
de Hieronymo, non de Augustino, non de Bernardo, non de Concilio
Arausiano, sed de filio suo Domino nostro Jesu Christo. Hunc audite. »
Quasi vero de sanctis Ecclesiæ pastoribus et doctoribus, tales in primis
Hieronymus, Augustinus, Bernardus, omnesque Arausianici Concilii
Padres fuerunt, Christus ipse non dixerit : Qua vos audit, me audit.

Sed ad cætera progrediamur, et omissis aliis, quos nimis longum
esset singulos recensere; Joannis Calvini testimonio, ac sententia con-
tentis simus. Is lib. ii. Institut. cap. 2. § 4. posteaquam philosophos
omnes incredibili consensione liberum arbitrium asseruisse professus
esset, ita subjunxit : « Tametsi Græci præ aliis, atque inter eos singu-
lariter Chrysostomus in extollenda humanæ voluntatis facultate, mo-
dum excesserunt; veteres tamen omnes, excepto Augustino, sic in hac
re aut variant, aut vacillant, aut perplexe loquuntur, ut certi fere nihil
ex eorum scriptis referre liceat, qui postea secuti sunt, dum pro se
quisque in humanæ naturæ defensione argutiae laudem captat, sensim
ali post alios in deterius continuo delapsi sunt. » Hæc ille. Ex ejus
verbis nemo vestrum (opinor) non facile colligit, propterea scriptores
omnes (Augustino excepto) tam veteres, quam recentes Calvinus minus
placere, quod sententia ipsius de servo arbitrio nimis libere adver-
sentur. Alioqui quid sibi vult querimonia illa, quæ paulo post in eodem
libro sequitur ? « Nimis, inquit, philosophice hac de re locuti sunt, qui
se Christi jactabant esse discipulos. Nam quasi adhuc integer staret
homo, semper apud Latinos liberi arbitrii nomen extitit. Græcos vero
non puduit multo arrogantius usurpare vocabulum. Siquidem ~~avere posse~~
dixerunt, ac si potestas sui ipsius apud homines fuisset. »

Ac ne solum de nomine liberi arbitrii, sed etiam de re ipsa loqui
eum existimetis, audite quid cap. 3. §. 11. dicat : « Ac voluntatem,
inquit, Deus movet, non qualiter multis sæculis traditum est et cre-
ditum, ut nostræ postea sit electionis motioni aut obtemperare, aut
refragari : sed illam efficaciter efficiendo. Illud ergo toties a Chrysostomo
repetitum repudiari necesse est, Quem trahit, volentem trahit. » Itaque
non modo Calvini testimonio liberi arbitrii nomen in Ecclesia semper
fuit, sed etiam dogma, et doctrina Chrysostomi ætate exstabat, ac de-
inceps multis sæculis tradita, credita, propagata, confirmata est.

Sed a partibus suis Augustinum Calvinus habet, ejusque viri longe
doctissimi patrocinio fretus, cæteros omnes merito despicit. Omitto
primum quod etiamsi B. Augustinus Calvino faveret, tamen neminem
tam iniquum judicem esse oportet, qui unum hominem quamvis
doctissimum, omnium sæculorum Patribus et Doctoribus, totique
Ecclesiæ, atque adeo orbis terræ consensui anteferret. Taceo deinde

quod B. Augustinus in libro de gratia et libero arbitrio cap. 2. clarissimis verbis Calvinum hæreticum pronunciat, cum ait: « Est igitur liberum arbitrium; quod quisquis esse negaverit, Catholicus non est. » Id quod sexcentis aliis in locis repetit, ut suo loco palam faciemus. Nihil etiam dico, quod in eodem lib. Calvinus parum ingenue, ne dicam impudenter, ab illo ipso Augustino recedit, quem sibi solum ex omni vetustate patronum reliquerat. Sic enim ait c. 3. §. 7. « Sed erunt forte qui concedent voluntatem a bono suopte ingenio aversam, sola Domini virtute converti, sic tamen ut preparata suas deinde in agendo partes habeat. Quemadmodum docet Augustinus, omne bonum opus gratiam præcedere, et id comitante, non ducente; pedissequa, non prævia voluntate. » Et paulo infra, hanc ipsam B. Augustini sententiam refellens: « Sed quia, inquit, reformata opus est Domini, hoc perperam homini tribuitur, quod gratiæ prævenienti pedissequa voluntate obsequatur. » Quid clarius? et ubi nunc est illud, excepto Augustino? ubi tua, Calvine, jactatio?

Sed his prætermis, illud unum dicam, quod silere nullo modo possum, adeo parum vero, ac simplici testimonio B. Augustini confisum esse Calvinum, ut ausus non fuerit locum unum, eumque diu quæsitum, et ex omnibus selectum proferre, nisi multis fucatum coloribus, mendaciisque bene suffultum, ac diligentissime fraudibus obvolutum. Sic enim loquitur ad finem ejusdem cap. 3. « Audiamus, inquit, nunc Augustinum suis verbis loquentem, ne ætatis nostræ Pelagiani, hoc est, Sorbonici sophiste, totam vetustatem nobis adversam pro suo more criminentur. Libro de correptione et gratia ad Valentini fusi exequitur, quod breviter, ejus tamen verbis referam, gratiam persistendi in bono, Adæ fuisse datam, si vellet: nobis dari ut velimus, ac voluntate concupiscentiam superemus. Habuisse ergo illum posse si vellet, sed non velle ut posset: nobis et velle dari et posse. Primam fuisse libertatem, posse non peccare: nostram multo majorem non posse peccare. Ac ne de futura post immortalitatem perfectione loqui putetur (sicuti perperam Lombardus eo trahit) scrupulum hunc paulo post eximit. Tantum quippe, inquit, Spiritu sancto accenditur voluntas sanctorum, ut ideo possint, quia sic volunt; ideo velint, quia Deus operatur ut sic velint. » Hæc ille.

Numerate mendacia. Primum, illa verba: « Primam libertatem fuisse, posse non peccare, nostram esse multo majorem non posse peccare »; nusquam in toto Augustino, ne dum in eo libro, inveniuntur. At, si non verba, certe sententia invenitur. Cur ergo dixisti: « Audiamus nunc Augustinum suis verbis loquentem? cur addidisti, quod

ille fusius, ego breviter, ejus tamen verbis referam? » cur B. Augustini verba pollicitus, tua postmodum nobis obtrudis?

Quid? si nec sententiam inveniri demonstravero? nonne S. Augustinus in libro suo de hæresibus, Joviniano heresiarchæ tribuit hanc sententiam, homines justos etiam in hac vita non posse peccare? nonne in libro de spiritu et littera extremo, atque aliis in locis passim docet, neminem esse tam justum, qui non aliquando peccet? Quis igitur credat Augustino verba illa excidere potuisse, quæ Joviniani sententiam continent, quæque omnibus fere libris ejusdem Augustini maxime repugnant? Atque hoc est mendacium primum.

Alterum deinde in illis verbis continetur, ubi Lombardum reprehendit, quod S. Augustini verba de secunda libertate perperam traxerit, ad eam perfectionem, quæ post hanc vitam erit. Ad quod mendacium refellendum ipsa per se B. Augustini verba sufficiunt. Hæc enim sunt vera Augustini verba: « Prima libertas erat, posse non peccare: novissima erit multo major, non posse peccare. Prima immortalitas erat, posse non mori: novissima erit multo major, non posse mori. Prima erat perseverantiae potestas, bonum posse non deserere: novissima erit felicitas perseverantie bonum non posse deserere. Numquid, quia erunt bona novissima potiora, atque meliora, ideo fuerunt illa prima, vel parva, vel nulla? » Ubi non ait Augustinus (ut vult Calvinus) nostra libertas est non posse peccare: sed novissima libertas erit non posse peccare. Quo quæso pertinet illud, « novissima »? quo illud, « erit »? nisi ad tempus futurum et si (ut Augustinus dixit) illorum erit non posse peccare, quorum erit non posse mori: quis nisi insanus dicat, nostrum esse non posse peccare, qui non modo possumus mori, sed etiam non possumus non mori? denique si bonum non posse deserere, perseverantiae mercedem, atque ipsam felicitatem futuram Augustinus dicit, qua fronte, quo ore Calvinus illud ipsum ad hujus vitae brevisimæ, atque infelicissimæ statum trahere conatur.

Jam vero cum negat Calvinus vetustatem sibi adversari, quod idem et in libro adversus Pighium, et in prefatione Institutionis, et alibi passim repetit, non solum prodige mentitur, sed etiam egregie secum pugnat. Nam si veteris Ecclesiae ea sententia fuit, quæ nunc Calvini est, ex necessitate omnia fieri, nullam esse libertatem, nullam contingentiam, quo pacto semper in Ecclesia liberi arbitrii nomen extitit? qui fieri potuit, ut veteres omnes (ne Augustino quidem excepto) nimis philosophice locuti sint, atque in defensione humanæ mentis virium, modum excesserint?

Dicturi sunt fortasse, sententiam suam, sententiam Christi et Apolorum esse, quorum litteræ omnium Patrum commentariis quemad-

modum auctoritate, sic etiam antiquitate præstant. At ego libenter ab eis vicissim quererem, utrum tandem Christum et Apostolos arbitrentur doctrinam suam prædicatione, et miraculis propagasse, an vero inutiliter, et sine ullo fructu rem egresso. Non erunt, opinor, tam ingratii, ut Christum et Apostolos, atque ipsum etiam Spiritum Sanctum qui per ipsorum linguis loquebatur tanto tempore, tot concionibus, tot signis et prodigiis, nihil egresso dicant.

Quod si doctrinam suam Christus et Apostoli, ut res est, plurimi hominibus persuaserunt, et longe, lateque ad fines usque orbis terræ propagarunt; eaque doctrina ita philosophorum placitis adversatur, ut liberum arbitrium (ut Calvinus dicit) tanquam impium quoddam flagitium penitus tollat, ac destruat: cur obsecro semper in Ecclesia, ut idem ait Calvinus, liberi arbitrii nomen extitit? cur nomen servi arbitrii ante Lutheri tempora nunquam est auditum? cur illi omnes Patres et Doctores, qui Apostolis proxime successerunt, quemadmodum ex Centuriis Illyrici jam didicimus, liberum arbitrium, et non servum potius docuerunt? cur statim post Ecclesiæ auspicia (ut Philippus loquitur) libertas arbitrii juxta sententiam Philosophorum predicari cepta est? quo cemento, quoësio, quo glutino poterunt sententia ista ita conjungi, ut aliquo modo inter se cohærent? Christus et Apostoli populis, gentibus, nationibus, orbi terrarum universo, nullum esse in homine liberum arbitrium persuaserunt; tamen nemo unquam id credidit, semper in Ecclesia liberi arbitrii nomen extitit; veteres omnes in defensione liberi arbitrii modum excesserunt; philosophiam redolet quidquid omnino commentaris proditum est.

Quamobrem nemini dubium esse jam debet, quin hujus temporis hæretici, dum contra liberum arbitrium tam audacter disputant, eam doctrinam in Ecclesiam invehant, quam ipsimet intelligunt, et confitentur omnibus veteribus Patribus, toti antiquæ Ecclesiæ, orbi terrarum universo omnium gentium sensui, et consensui repugnare.

Quod quidem ejusmodi est, ut ego dum in eorum libris verba ipsorum paulo attentius lego, ita vehementer admirer, ut vix oculis meis credam. Quis enim non obstupescat? quis credit existere potuisse homines tam projectæ audaciæ, tam incredibilis superbiæ, tam insolentis arrogantiæ, ut se Doctoribus omnium gentium, et omnium sacerdotum Gracis, Latinis, sacris, profanis, veteribus, recentioribus anteponant? et qui post mille, et quingentos annos dicant, nullæ sunt in Ecclesia sincera litteræ: omnes Patres erraverunt; nos soli sapimus; nos soli videmus; cæteri hallucinantur, et delirant universi?

Quæ cum ita sint, nulla sane fides, ejusmodi monstris tam absurde delirantibus debetur: præsertim si illud addamus, doctrinam de servo

arbitrio primum locum inter adversariorum dogmata obtainere. Sic enim loquitur Lutherus in assertione art. 36. qui est de arbitrii libertate: « In cœteris, inquit, articulis de Papatu, Conciliis, Indulgentiis, aliisque non necessariis nugis, ferenda est levitas et stultitia Papæ et suorum: sed in hoc articulo, qui omnium optimus, et rerum nostrorum summa est, dolendum, ac flendum est, miseros sic insanire ». Hoc nimis addendum supererat ad cumulum furoris, ut non solum ipsi furerent, sed etiam eos omnes, qui non pariter furunt, insanire arbitrarentur.

Sed profecto si in eo articulo, qui ipsorum judicio omnium optimus, et rerum Lutheranarum summa est; adeo manifeste, vehementerque delirant, ut nullam omnino fidem, nisi forte ab iis, qui pariter insaniant mereantur: multo certe minus in rebus cœteris ulla eis fides ab hominibus sanis et sobriis haberi deberet.

Quia tamen justissimo Dei iudicio, peccata hominum castigante, ac puniente, non defuerunt, nec desunt permulti, a quibus nova ista hæreticorum dogmata, licet absurdæ et incredibilia sint, avidissime tamen excipiunt et approbant: nostræ partes erunt, totum hunc locum diligentissime pertractare, et tam in statura et confirmanda veritate, quam in evertendis, ac refutandis erroribus contrariis operam, laborem, vigiliam quantum maximam poterimus, collocare: quod effecturum me omnino confido, si Dei primum benignitate, ac favore, deinde etiam vestra alacritate, et studiis adjuvabor.

ORDO DISPUTATIONIS

De Gratiae reparatione, quae est potissima totius hujus operis pars, tria disputanda se offerunt; Primum enim de Gratia et libero arbitrio differentium erit. Haec enim sunt fundamenta totius aedificii reparandi: « Tolle inquit, S. Bernardus in libro de Gratia, et libero arbitrio, liberum arbitrium, non est quod salvetur; tolle gratiam, non est unde salvetur. Deinde de ipsa reparatione Gratiae, id est, de justificatione impii disputandum erit. Postremo addendum de consequentius justificationem, id est, de fructibus et bonis operibus justificatorum.

Porro de Gratia et libero arbitrio sex erunt libri. Primus, de Gratiae acceptionebus et partitionibus. Secundus, de Gratiae communicatione et prædestinatione. Tercius, de natura iheri arbitrii. Quartus, de viribus arbitrii et gratiae necessitate in naturalibus. Quintus, de iisdem in moralibus. Sextus, de iisdem in supernaturalibus.

ORDO DISPUTATIONIS